

INUIT ATAQATIGIIT INATSISARTUNI



9. juni 2025

UKA2025/90

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Nunatsinni tarnip pissusaanik ilisimatusarnerup iluani ilinniarfimmik imaluunniit pikkorissaanernik pilersitsisoqarnissaannik pisariaqartitsineq kiisalu taakku aningaasaqarnikkut allaffissornikullu kingunerisassaas pillugit Naalakkersuisut nassuiaasioqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortat Mariane Pavisen Jensen, Paarma Lund Kreutzmann, Inuit Ataqatigiit)

Tunngavilersuut:

Nunatsinni tarnip pissusaannik ilisimasalinnik sullissisinnaasunik ukiorpassuarni amigaateqarluta ingerlavugut. Innuttaasut inuit tarnikkut eqqarsartaasikkullu ikiorserneqartariaqartut ikiliartunngillat, amerliartuinnarpulli.

Ajornartorsiutit nunatsinni annertuut amerlasuut pigaagut, ilaatigut oqaatigineqartarpoq nunasiaataasimanerup kingunipiluik ajornartorsiuteqarluta inuusugut, amerlavallaat nunatsinni inuuniarnikkut ajornartorsiuteqarput.

Naalakkersuinikkut pingaarnersiuinermi *“Peqqissutsimut tunngatillugu isumaqatigiissut 2023¹”*-mi tarnikkut nappaateqarneq pillugu naalakkersuinikkut iliuusissanik siunniussaartoqarpoq. Sammisat tallimaattut iliuuserineqartussat ukiut 1-3-it akornanni tassaavoq Kalaallit Nunaanni tarnikkut katsorsaasarneq ataatsimut isigalugu pilersaarusiornissaq.

Pisariaqartitarput tassaavoq nunatsinni tarnikkut napparsimasut peqqinnissaqarfimmit sullinneqarnerat eqqarsaatigalugu sulisut qassit suliassallu suunerit pisariaqartinneqarnersut sukumiisumik ilisimassallutigu. Peqqinnissaq pillugu Ataatsimiititaliarsuup isumaliutissiissutaani tarnimikkut nappaatilittut nalunaarsorneqarsimasut 1400—it missaaniipput. Innuttaasut 2,4 %-ii. ²

Innuttaasut tarnimikkut ikiortariaqartut ikiorneqarnissaminnut tunngavii assigiinngitsorpassuupput.

Ilisimavarpullu nunatsinni aamma inuunerluuteqartorpassuaqartoq. Amerlavallaat imigassamik, ikiaroornartumik aangajaarniutinik atornerluinermik ajornartorsiuteqarlutik inuupput, amerlavallaat

¹ [kal-sundhedsforlig-m-underskrift.pdf](#)

[Partier indgår aftale om et sundhedsforlig](#)

² [Sundhedskommissionen præsenterer sine anbefalinger](#)

[Peqqinnissaq pillugu Ataatsimiititaliarsuup innersuussutini saqqummiuppai](#)

imminut toquttarput, ilaqtariit amerlavallaat avissaaqqallutik inuuneqarput innuttaasullu ilaat tarnimikkut nappaateqarlutik inooqataapput, amerlavallaat ikiorneqaratik inuunerminnik ingerlatsipput.

Inuiaqatigiittut annertuumik ajornartorsiutigaarput inuusuttortatta inuunerminnik ingerlatsiniarnerminni ajornartorsiungaarlutik imminut toqunnissamik eqqarsaateqarlutik, allaallumi misiliillutik imminut toqoriarsimasunik amerlavallaallu imminut toquttarput. Nanertuuteqarluni eqqarsaateqartuni imminullu toqoriarsimasuni saaffissaasuaneq annertuumik ajornartorsiutaavoq, uani pinngilarput oqarasuaatikkut saaffissat, timitalimmik saaffissat pivagut, peqqinnissaqarfik ilisimasamisut suliariumasai tassaapput timikkut innarlarsimasut, tarnikkut innarlarsimanermi ikiorneqarsinnaanngiinnermik allaat aqqusaagaqarlutik nunatsinni inooqataasoqarpoq. Amerlasoorpassuit meeraanerminni inersimasullumi aamma kinguaassiutitigut atornerlunneqarsimasuupput, taakkulu piaartumik ikiorneqarnissaat pisariaqarluninartuuvooq, ajoraluartumillu pinasuartumik ikiorneqarnissaminni utaqqisariaqartarneq allaat aqqusaartaraat tusarsaasarpoq. Nunatsinni tarnimikkut napparsimasunut ikiuvisinnaasunik ilinniarsimasunik annertooujussuarmik amigaateqarpugut, ingammik isorliunerusuni inoqarfinni mikinerusuni amigaateqarluninarpugut.

Periarfissat assigiinngitsut tamaasa isigalugit eqqarsaasersortariaqarpugut ass. peqqinnissaqarfimmi sulisut piginnaasamikkut ineriartortittuarnissaat aammalu tarnip pissusaanik ilisimasaqalernissaq siunertaralugu ilinniaqqissinnaaneranik periarfissiinikkut. Tamakkua qulaajaneqartariaqartut isumaqarpugut, Naalakkersuisut §37 naapertorlugu apeqqummut akinnerminni aningaasaqarnikkut allaffissornikullu kingunerisassaas pillugit qulaajarneqarsoqarsimanngitsoq paasinarsimmat.³ Isumaqarpugullu siunissami tarnip pissusaanik ilisimasalinnik nunatsinni ilinniarsinnaaneq periarfissaasariaqartoq, maannakkut nunaqqatigut nunamut allamukarlutik tarnip pissusaannik ilinniaqarnissaat kisimi periarfissaavoq. Qujanarpoq nunatsinniit aallarlutik ilinniareerlutik nunatsinnut uterlutik sullisseqataallutik inuuneqalersartut, kisianni isiginiartariaqarparput nunatsinni immikkuullarissumik kalaaliusugut inooriaaseqarlutalu eqqarsartariaaseqarnerput. Siunissamut eqqarsarluta pilersaaruteqarnissarput pisariaqarpoq, qularnanngilarlu tarnip pissusaanik ilisimasalinnik pisariaqartitsiuaannarumaarnerput, taamaammallu ilinniarfimmik pisariaqartitsiuarumaarnerput nalunanngilaq.

Tarnip pissusaannik ilisimasannilinnik ilinniarfimmik nunatsinni pilersitsinertigut nunaqavissunut periarfissiissutit pitsaaqutissaa tassaasussaapput, uagut namminermik eqqarsartariaaserput aallaavigalugu, ajornartorsiutilinnik katsorsaannermik ingerlatsisinnaanermik ineriartortitsisinnaalissagatta. Ullutsinni katsorsaariaatsit naak inuit eqqarsartariaasai assigiikkannarsinnaagaluit nunatsinni uagut immikkuullarinnerulluta eqqarsartariaaseqarnerput aallaavigalugu katsorsaasinnaanermik ingerlatsisinnaanermik ersarissumik ilisimasanik katsorsaateqartariaqarluta ilinniarfigineqarsinnaalerneru. Qasseerarluta tusartarparput nunaqqatitta ajornartorsiorluni ikiortissarsiorluarnermini ikiortiginiakkat qanoq ajornartigineri, qasseerarlunga tusartarpagut nunaqqatigut tarnip pissusaanik ilinniaqarusukkaluarlutik nunatsinni periarfissaqannginnertik pissutigalugu ilinniakkamik aallartitsinngitsoortartut.

³ https://ina.gl/media/v5wbbrfz/090_2025_psykiatrisk_uddannelse_palkr_akissut.pdf
https://ina.gl/media/hqrfslhd/090_2025_psykiatrisk_uddannelse_palkr_svar.pdf

Ilinniarfiup inulerisunut tamanut ikiorsiisinnaasunut pikkorissarfigineqarsinnaallunilu, kittaartumik ilinniarfigineqarsinnaaneranik periarfissiisuusariaqartoq takorloornarpoq, assersuutigalugu perorsaasut, isumaginninnermut siunnersortit ingerlaqqiffiusumik ilinniaatigalutik sulinermik ingerlatsiffigisinnaasaannik, tarnip pissusaanik ilinniagaqarfigineqarsinnaasumik. Ataavartumilli ilinniarfiusinnaasumik pilersitsinissaq pisariaqarluinnartuuvoq, tamannami maannangaaq tamatta takusinnaavarput. Tamatumunnga atatillugu ilinniarfiup sumiisinnaanera inissisimaffisaalu ilinniartitsinissamut pilersaarutissat isiginiarlugit nalunaarusiaq imaqartinneqassasoq isumaqarpugut.

Taakku tunngavingalugit Naalakkersuisut tarnip pissusaannik ilinniarfimmik nunatsinni pilersitsisoqarnissaannut nalunaarusiortoqarnissaanikpeqquneqassasut siunnersuuteqarpugut. Taamak siunnersuuteqarluta Naalakkersuisut partiillu akissutissaat qilanaarlugit oqaatigissavarput; qanortoq nunatsinni ilinniarfigineqarsinnaasunik periarfissanik amerlisaanermi peqatigiikkisa.

Pisortanut aningaasatigut allaffissornikkullu kingunerisassai:

Nalunaarusiorneq A/C fuldmægtigip ukiup ataatsip ingerlanerani sulinissaa 500.000. kr-inik naleqassasoq naatsorsuutigineqarpoq.

Namminersortunut aningaasaatigut allaffissornikkullu kingunerisassai:

Soqanngilaq.

Innuttaasunut aningaasatigut allaffissornikkullu kingunerisassai:

Soqanngilaq.